



Рут мувеман нумман ат тайлайм



Хор: vk.com/spmuzhi

Ялап тад тылац нядъяң педа олаңмет хатадан Роман Прокопьевич Ругин шуңат сэма питам хатлац постала. Улмац хуват ар луңтар па потар шуп ханты па руц ясаңан ханшилдыс. Тухал рупатайлац па мув мир ёх ясаң понман улдат.

Сэма питам хатлац кеша Пулцават вошан, «Культурный центр «Наследие» нэпек луңатты хотан «Рут мувеман нумман ат тайлайм» вантапса лэцатса. Щита Роман Прокопьевич ханшам нэпекат эталтадайт.

Книгайлац хуват па мир хоятат хантэт эдты уятты питсат, шимла хащам рут хоятат муй хорпи хорам ясаң, сох, пормас па сама мосты рут мув тайлат.

Ялап тад тылац хольмаң педа кимет хатл эдты курк тылац ветмет хатл унты вантапса рупитты питал. Кашң хоят тохи лоңтыты верытал.

Сэма питам Питлор куртадан нийдмет пуш луңтарат луңатты касапса лэцатла.

Касапсая пилтацты ураңан Роман Ругин ханшам луңтар уалдатты, муй па потар шуп

луңатты па ши вер нёхты хора лэцатты мосал. Рупатайт, Питлор куртаң нэпек луңатты хота электронной почта хуват китты.

Рупатайт пирыты хоятат нёхты хорат хуват вантлат, хоты тусаңа, хорасаңа па ант тахрамтыман луңтар муй па потар шуп луңатса.

Луңтар луңатты касапсайн нох питам хоятат ялап тад тылац хольмаңмет хатадан ясталайт Китап рупатайт няд возрастной номинация хуват мойлаптадайт.

Зоя Куртямова ханшам потар

Ялап программа лэсаятла

Хон мув Правительство математика па естественной наука уалдыты верат елды туты ураңан вет тада план лэсаятса. Округеван си вер кеша округ кусяйт па уйтантысат.

Округ ашкулдаятан няврэмат уалдытаты хоятата урокит ситы лэсаятты па туты мосал, няврэмата каш уалдытаты ат ус. Ай кер тылац олаңмет хатл унты си нэпек лэсаятла.

Ямал мувеман си направление хуват 1-4 классан уалдытаты няврэмат ураңан лапатхосьяң математика класс пуншман ул. Уншак няврэмат кеша ветьяң педа вет естественно-научной класс рупитал. Пулцават, Ноябрьск па Новый Уренгой воштан хулам ашкулдаятан точной дисциплинаята няврэмат уалдытат. Округ няврэмат хон мувеман верты профильной сменяята, олимпиадаята лэсаятты тахая, кванториумата тутдыдайт.

Региональной уалдытаты верат туты институт куся ху Артём Тылик сит эдты потар верас: «Округ кашң курт ашкулдайн 7-9-мет классатан уалдытаты няврэмат ураңан симась классат пуншты. Няврэмат уалдытаты ёх хон мувеман верты уалдытаты харата китыдыты. Мет тусшак ВУЗат етшаты па яма рупитты хоятат «Округ няврэмат уалдытаты хоят» касапсайн касты верытлат па 1,5 миллион солдува унты ёша паятты».

Альбина Тырлина ханшам потар

Волаң нэмн юкантса

Ас халты тылац 28-мет хатадан Карвош куртан Љорвош районан сэма питам хатнэху Владимир Егорович Енов, мата хоят айкелат муй монцат ханты па руц ясаңатн иса ханшал, «Ветеран труда Ханты-Мансийского автономного округа – Югры» нэмн юкантса.

Мосал ястатты, хоты Владимир Енов талаң 24 тал сыс корреспондент ширн Югра мув округ «Ханты ясаң» газетайн айкелат акатман ул па рупитл. Ущ ёхатты тылац олаңмет хатлатн там 2025-мет талэвн лув овс муватн рупитты верлац 40-мет тал араата ши ёхатлат. Мет олаңан лув Асовн худ велпаслаты тахайн рупитас, щалта 10

тал сыс Томской область овс мувн руц няврэмат руц ясаңа па литература уалдытас. Ёхи хащам порайн Ёмвошан ул, «Ханты ясаң» газета хоца рупата тайл. Тата ищиты айкелат акатл, ханты монцат мирэв ураңан туса ханшал.

Там волаң нэмн юкантам ураңан, Владимир Егорович Енов тамхатл ям вуца ясаң муң китлул!

Хор: Владимир Енов



Сотмет талдэл постасэл

Хасям сютсэты хатадан Пулңават вошан ОЦНК каш верты хот 100-мет талдэл постас. Тамхатл сита хольмаң педа лапат каш верты группа рупитал. Си хота яңхты няврэмат па ун хоятат яклат, арыдат, монсят, йис улапсайт эталтылат.

Сита ар рут мир ёх ияха рупитман округ хоятлува каш тулат, уятты верлада няврэмат уталтадат. Хон мувеван па па вошатан манты фестивалытан, вантопсаятан, уйтантопсаятан касдат. Яха шоши мир ёх улапсаев, щирлув-пищлув шавиллув па елды тулдув.

Емаң хатадан ОЦНК хотан ун каш лэсятса. Ун пора сис ар рупата верман ус, ар хоят рупитас. Мет тусшак рупитты хоятат мойлаптасайт па мойлапса ясаңан ястасайт.

Каш верты хотан методиста рупитты ханты нэңиев Наталья Фёдоровна Ребась потар тус: «Ма си хотан хус тал арыты хоятат пидан рупитлам.

2005-мет тал элты «Сорни тутые» ханты арат арыты группая энамты ёх па ун хоятат яңхсат. 2009-мет тал элты няврэмат пидан рупитты питсам. 2023-мет талдан ялап няврэмат вусам. Там хатла группаеан катхосьяң няврэм арыйл. Рупитам талдам хуват муң пилэван Валерий Григорьевич Прыжанков рупитал, нарасьюхан ёнтад. Эвет па похат хорам ханты нарас сыята уталтад.

ОЦНК хотан рупитты сис ар ям хоят рупитас. Лув кутэдан ханты хоятлув па



Хор: Наталья Ребась

усат. Сит – Антонина Константиновна Ануфриева, Надежда Николаевна Конева па Владислав Александрович Озелов шуңтат. Ма лувилал нумлалдам, лув элтэл туп ям ясаң ястадам. Яха муң йи вер версув, ханты арлув, яклув, улапсайлув актыдысув па хон мув хуват, округеван па ай куртатан эталтыдысув.

Там йисан ма арыты группаем тумпийн Юрий Германович Нензелов пидан емаң хатлатан, ай няврэмат яңхты хотан арылман па якламан, ханты емаң хатлат эталтылман. Ходна ма нарасьюхан па торсапалан ёнтты уталтыдам».

Елды педа, няврэмат пидан ханты щирлув-пищлув шавиман, рупатаем елды тулэм.

Альбина Тырлина ханшам потар



СВО хося улты ёх уталтаты питлайт

Там талдан курк тылась хольмаң педа худмет хатл элты, высшой па средний профессиональной образование тайты СВО хося улты хоятат, «Герои Ямала» программа заявка-нэпек китты верылдат. Си ёх елды хоятат пидан рупатаел тулат, си кеша уталтаты питлайт.

Округев хуват си программа каматса ятан манал. Мет одна, ай кер тылась хасям хатл унты ханшлтантыты, анкета па елды рупитты верэл элты потар шушие ханшты мосал. Ущ тылась катхосьяңмет хатл унты онлайн-тестирование па потар хуват вантла, хоты си хоят па хоятат пидан рупитты хошдат.

Уйт дор тылась одаңмет хатл унты уталтыты ураңан ханшлталдыт. Кашң хоят лувел лавадты хоят тайты питал. Мет яма лувилал эталтаты хоятат «Герой пора» хон мув программа хасям ятан касты питлат.

Уталтыты верат тумпийн, ар хорпи уйтантопсайт, уталтапсайт лэсятлайт. Касты хоятат пириты ураңан Общественной совет рупитты питал. СВО хося улты хоятат ёхи ёхатты юпийн, нётлайт. Атэл ант хасты ураңан, кашң хоят пидан рупата манты питал. Кашң елды уталтыты утситы хоят уталтала.

Альбина Тырлина ханшам потар



Хор: Андрей Ткачев

Касапсайн нох питам нэ

Там ванан Москва вошан касапса манас. Хон мувев вошат, куртат па Таджикистан мув элты ёхтам катсот молтас няврэмат ашкулдайн уталтаты хоятат мет яма тыйты рупатайлал эталтасдал.

Касапса вер паты унты тувам хоятат кутан Ващъёханован рупитты уталтаты нэ Милана Лама-Саан «Няврэмата маты мет ям урокем» рупатайл пидан одна этас. Ашкулдайн лув куртаң няврэмат английской ясаңан потарты уталтад.

«Муң ашкулдаеван елпи рупитам уталтыты нэңев щутщаты манмал юпийн, молты кем па хон мув ясаң щак ант уталтысув. Ашкулда етщаты порайн, англий-

ской ясаң экзамен маты мосал. Па ашкулдаятан уталтыты няврэмат кутан, щи экзамен такды муң еша ёлташак хащлув. Ялап уталтыты нэ ёхтам юпийн, мох-

ты кеншак питас. Лув кашң классан урокат тул. Уншак няврэмат экзамен маты щира лэчатлалды. Ёлташак хащты ай няврэмата ясаң моштаты па оша пайтты нётал», – куртаң ашкулдайн уталтыты эви Анастасия Ребась ястас.

Милана Шолбановна яңкем тал ашкулдайн рупитал. Щи талдал элты кат тал Ващъёханован. 2023-мет талдан «Земский учитель» программа хуват Дорвош района рупитты ёхтас.

Зоя Куртямова ханшам потар



Хор: vk.com/moy_shur

Герой тада постама уйтантопсайт манлат



Хор: Пулцават вош администрация



Хор: polkrug.ru

Там тал хон мувеван Герой тада постаса. Сишан кашц хон мув тахайн ар хорпи уйтантопсайт, вантопсайт вердайт. Водаң па там порайн манты лялян улам па улты хоятат, Водаң Ляль ураңан рупитам ёх элты потрат ханшдайт, кинайт эталтыдайт.

Водаң Ляль 80-мет постама тада хон мув куся «Ляль ураңан рупитам вош» почётной нэман Пулцават вош юкантсалды. Там пора няврэмат па ун хоятат уятты па нумты питдаат, хоты округ хоятлув ляль ураңан юрлад па дылдад ант сялитман рупитсат. Сишан там порайн улты хоятат водаң вош нэм елды тулдэл, рупатайдалан, вердалан альлэл.

Пулцават вошан тал сыс кат-

сот педа ветъяң молтас уйтантопса верда. Хасям сютсаяты хатлатан Геолог хотан «Пулцават – Трудовой Доблесть вош» фестивал верса. Ар харат ларшитман усат. Ляль пора улапса, муй хорпи рупитты тахайт вошан усат, хоратан, потратан па нэпекатан альман усат. Муй арат юх па даращ дэсятты тахайн пормас верман ус, нэхты хоратан эталтыса.

Си тумпийн, Пулцават вошэва си нэм маты ураңан, муй хорпи нэпекат нётсат, «Ляль кеша округ нёталса» нэпек ханшам нэ Ольга Рябкова пидан потрэмиты рахас.

Си хатадан хоятат мастер-

классатан ар хорпи пормасат версат, касапсайн кассат, СВО хося улты хоятлува нётсат, мосты пормасат акатсат па каш вантсат.

Тал сыс муй арат холна ям вер верман питал, ай-ун хоятат уйтантопсаята яха актащдаат. Ляльды ураңан, Водаң ляль порайн улам па рупитам, там порайн манам па ин манты лялян улты ёх хоятата ар ям ясаң ястада.

Альбина Тырлина ханшам потар



Хор: Айкоп Павел

Карты долты муй ун тус тайл

Ханты мир ар монсь тайл. Хась кашц монсьна ханты хоят ляксамдад карты овмалдаат, карты пайлдаат. Молхашак ма ар арысам, нэмл «Хапи ики». Сита си арыда, хоты Хапи ики анад алты солтанлада, сунад алты солтанлада ястал, Карты Пайлты ики хося яңхтыя па Карты Русь пайлты партия. Лув сирадна ат шушал, лув сирадна ат сякантийд.

Дахар, алты кеши, наары, уңты, лайм, юхад нёл карты – ханты хоят иса хошас вертыя. Ин Ханты-Мушина па си си вер нох аламса. Музейңан куся нэңңана Анна Геннадьевна Брусницыная па Алла Васильевна Коневая ун пумасипа ясаң ястадув.

Керан Митры ханшам потар

Нэм нэпекатан масайт



Хор: vk.com/popovolegshur

2025-мет тал – Мув сайлаты хоятат Тала постаман ул. Щи кеша кашц куртан, кашц вошан уйтантопсайт, арсыр каш альты па касапса манты харат дэщатдайт.

Хашам лапатан, Пулцават вош куца ху нялхощъяң тада ювам хольмаң педа худам няврэма ёш нэпекат мас. Щи-мащ вер, ин емаң хатлат лепан, кашц ашкудайн верты питдайт.

Дорвош районан, Мув сайлаты хоятата постама Тал уйтантопса манам порайн, ёшан тайты нэм нэпекат ихощъяң няврэма катлаптаса. Асов, Ващъёханов, Дорвош па Мужи вош куртаң эвет па похат иса нумман тайты питдэл, хоты лув Дорвош куца ху ёш элты нэм нэпекан масайт.

«Ямал мувеван юраң па самаң хоятат улдат. Ма нумастэман, кашц нэм нэпек ёша вуйм няврэм, щаха ищи водаң хоята йил. Щи кеша яма утадтыты мосал, ун хоят ясаң хулантты па пилдал пидан сам элты йиты ям верат верты», – Дорвош куца ху Олег Попов ястас.

Зоя Куртямова ханшам потар

ОБЪЯВЛЕНИЕ

СЛУЖБА ПО КОНТРАКТУ В ВС РФ

Полная информация по телефону: **8(902)81-6-11-90**
Звонок по России бесплатно

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
5 000 000 Р
ЕДИНОВРЕМЕННАЯ ВЫПЛАТА
2 300 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период формирования проживания в г. Салехарде бесплатно, 3х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

1 900 000 Р Единовременно от региона
до 120 000 Р Служба на контракт

400 000 Р Министерство обороны
Законное военное социальное контракта

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

РЯДОВОЙ ОТ 210 Т.Р.
СЕРЖАНТ ОТ 232 Т.Р.
ПРАПОРЩИК ОТ 292 Т.Р.

«Овас мувие» арыты нэңат



Хор: Владимир Енов

Там ванан Асов курган Љорвош районан усом па щутщаты кемн аньжем элты айкел вусам, муй щирн лув Ямал муван ханты мирэв арат арыты группа там ёхи хащам талатан лэщатас.

– Ма нэмем Татьяна Ивановна Енова (Вальгамова), ин там кутатан щутщаман Пулңават вошан хотгэл ёхдам пилан улдам. Хащам тал порайн ма «Овас мувие» нэмпи арыты группа кущая питсам. Мет олаңан ма вошан улты ханты нэңат пилан нумассам, муйсыр нэман там арыты группаев нэматтыя рахал. Юхат «Овас мувие» нэман ар пелак нэңлуд кашащсат лувел юкантия.

– Муй ураңан щимащ ханты арат арыты «Овас мувие» группа вошан акатсаты?

– Щиканща, ёхи хащам талатан, муң ханты нэңат пилан «Пулңават вош» нэм тайты национально-культурной автономия тахая холдыена яңхсуб. Юхат па щи тахаев элты пуңда мантсуб па нумасты питсуб, муй щирн муңева ханты арат арыты хот ямсыева лэщатты мосал. Мет олаңан ай няврэмат нарас юхатан, муй па торсапл юхатан ёнтты «Сорни тутые» тахая нэңат пилан яңхсуб па иса ханты арат сыр-сыр емаң хатлат порайн арысуб. Юхат щи таха куща Валерий Григорьевич Прыжанков пилан уйтантатыя питсуб. Лув, ванта, баянан ёнттыя туса хошал па муң щи онтасэван арат арысуб. Мет олаң тылщатан там «Овас мувие» арыты хотэван туп лапат нэ яңхас, тамхатл муң

хощаева аратэлан 12 хатнэху иса ёхтыдыл. Мосал ястаты, хоты ар пелак лый элтайл ханты ясаң щикунш хулдат, туп лувел ямсыева ант па уйтлэл. Щимащ верат ураңан муң тата мет олаңан ханты мирэв арат туса уталталдуд па щи юпийн велщи дыел арсыр тахаятан мират елпийн арылдув.

– Татьяна Ивановна, муйсыр ханты арат мет олаңан нын самаңа арысты?

– Олаң пораятан, хун велщи арыты актащсуб, кат ар туп тайсуб: «Акем ар» па «Сорни туром». «Акем ар», ванта, куш тата, куш Югра муван ямсыева хоятатан уйтла. «Сорни туром» па муң ханты ёхлудан тата арыса. Ма щирэман, лув шеңк самаңа хоятатан хулантла па ищиты шеңк хорамаң ясчат тайл:

– Сорни туром, сорни туром, Сорни туром муң тайлуд.

Восты юхат, восты юхат Иса арат дойлат ...

Щиканща мет олаң тылащан куш холта ант ки вохлаюв, щи кат арңан арылуд.

Юхат па арсыр хоятат муңева потартыя питсат, нын па муй па арат ант па тайлаты, иса кашң пуш кат ар туп арылты? Щи вуш элты муң нумастыя питсуб, муй щиран арсыр арат тата верты емаң хатлатан муңева арытыя мосал.

Ас нопатты тылащан 2024-мет талдан муң «Овас мувиев» арыты группаев пуншам вер элты талдан тала йис. Щи порайн аратэлан 12 ханты мирэв арат муң тата яма нох уталтыман тайсуб па сыр-

сыр тахайн туса па хорамаңа лувилал арысуб.

– Муйсыр тахайт элты нын ханты мирэв арат мощатлаты, мосаң, матты хоятат нын хощайн щимащ арат туса арыты щиратан ханшлат?

– Муң, ванта, ханты мирэв кутан арсыр уйтантопсайт верлуд, сыр-сыр арат па арылуд. Щимащ верат ураңан ханты хоятлудан аратан ал щиты мойлалаюв.

Щиты Питлор куртаң нэңев Лидия Егоровна Нева муңева хулам ар китас. Ванта, ин лув эвел ищиты муң арыты хотэва яңхал. Нётопса юкана лув щи арат муңева щи масды. Щалта Зоя Николаевна Молданова, маты нэ Сытомино куртан Сорханл районан тамхатл ул, лув па хулам ханты ар муңева тата мосванан китас. Щи нэңлуд тумпийн, ханты монщат ханшты ху Владимир Егорович Енов ищи муңева аңкел шуңат элты ханшам арңан ар сувлад пилан мойлас. «Олаң ясаң» нэмпи арал муң нэңлуд пилан тата ямсыева уталтаслуд па ищи ар тахайн лувел арытыя питлэв.

– Татьяна Ивановна, «Овас мувие» ханты арат арыман, муй ям вер тамхатл тул, наң щирэнан, ханты хоятлудва мослат муң арлуд муй анта?

– Ма нумастэман, арсыр мират кутан муң ханты арлуд ищи шеңк яма тайлайт па хулантлайт, ошаңа-щацаңа верлайт. Щи щирн, муң шеңк мосты верат «Овас мувие» арыты нэңдам пилан кашң пуш лэщатлуд!

Владимир Енов
ханшам потар


Мирэн нума

Улты кен аңт ул –
Туп йи пуш тыйлуд,
Туп йи пуш уллуд,
Па йи пуш парлуд...
Куш мирэв ун ант ул,
Нэमतла – ханам, ханты.
Муй тащ мутра тайлан
Иса мирэн кеша мийи.

Нопсэн ёвра манас ки,
Ханты мирэн ёрэмасэн,
Рут ясең ант хошлэн
Щикунш – даварт
питал наңен
Омен ястал:
– Парас похем...
Сэмлад нюр лотхимел
Ант тайлат номас,
Куш уна таллидды
Сэмлад туп кущлат.
Кутюв доватые,
Амп иты хоратал,
Муң пелаев орыял.
Ясталаң наң:

– Щимащ ёх хой верас?
Мирэл ёрэмасэл,
Рут ясең ант хошлат
Па ясаңан щумпилат.
Потарал мир:
– Руца лув йисат...
Анта,
Лув рутды ампат,
Хошам хот элты
Ким хонтам катет.
Щи куңяр хоятат
Волдин поэтан
Ликан шеңк этсайт!
Лувилал ищи ма
Так ханты ясаңан
Ликащман няхлалдам,
Хомщеман сэңкдалдам!

Даниил Китаев



Хор: Альбина Гьрлина

Камн сот нятапсы тайта питлат

Ямал мувна хой «Социальной предприятие» нэм мощатта дьтл па маса мули тайл, заявка маты пора пунсса. Щимац нэм тайты предприятияйт, камн сот нятапсы па привилегия тайта питлат. Щимац нэм мощатта ЯНАО «Мой бизнес» нятл. Ловатдна, Ямал хуват 140 «Социальной предприятие» нэм тайл.

Мала предприятие мет такан ши нэм хоца рахал, государственной нятапсына мата питла па регион социальной предприятие реестр хоца лоңалда.



Хор: Илья Велей

«Касаң тал щимац социальной предприятие арры йта питас. Мет ямас лувидал

Ноябрьск, Пулңават, Новый Уренгой, Пуровской па Надымской районңан эттасдал

– щит сәңк ям. Лув нявремат онттады, леккар хататна па социальной защита хоца каман рот йидап методика тохы ләщатлат, ши онтасна Ямал мув нәңхәт нятлат», – ЯНАО «Мой бизнес» коца ның Вассилина Эварт лавас.

Итта, «Социальной предприятие» статусна матәт ораңна, па мули хой тайл, дырамтты ораңна, уц тылац алаңмет хатл маса «ИАС Мониторинг Ямал», «Мой бизнес», МФЦ хоца заявка мата, па ЯНАО экономика департамент хоца письмо китта рахал.

Хольмаң касты хар ләщатлат

Приуральской район территориальной избирательной комиссия знамты нәңхәт ораңна хольмаң камн рот онттады касты хар ләщатлат.

Энамты нявремат па хой мули там тал эвалт пирыта веритл, эттада маста питл, мала кем-

на лув избирательной права хаслат, ши ораңна камн рот касты харат, викторинайт па квестат ләщатлайт. Лув кат этапна ләщатса. Мет алаң этап курк тылацна пинтцал па Ас нопатты тылац холты маса манта питал. Кимет этап па унт дор тылац 18-мет хатл эвалт

ай тахайт потты тылац 31-мет хатл маса.

«Муң Приуральской мув знамты избирателят пидна уйтаныты ораңна сәңк лайласлу. Айкедат Приуральской район избирательной комиссия сайт хоца вантта рахал», – избирком эвалт лавса.

«Лыжня России» нәхамтта питлат

Хор: asbestadm.ru

Овс мув нәңхәт «Лыжня России» нәхамтта питлат. Приуральской район нәңхәт ищи сансна ант хыщлат, лув йи, вет па ең километра нымална нәхамтта веритлат.

Нох питты нәңхәт кубок, медаль, диплом па майлапсәтна мадайт, хой ялтасак ехатл – майлапсы такды ищи ант хыйлайт, лув орцидал сувенират ләщатсайт.

Муң округу хуват «Лыжня России» курк тылац 8-мет хатлна Пулңаватна, Ноябрьск, Надымской па Пуровской районңанна манта питл, Губкинской васна па курк тылац 8-мет хатлна па ай кер тылац 29-мет хатлна.

Щита касты ораңна «Госслуги» хуват заявка китта масл. Ямал мувна щимац касты хар 18-мет пус манта питл, касаң тал кат щәрс молтас нәңху нымална нәхамтал.

Маткапитал элатта питла



Хор: gubkinsker31

Федеральной маткапитал курк тылац алаңмет хатл эвалт энмал. Алаң няврем ораңна 60 щәрс солкувайна энмал, ловатдна 690 щәрс солкува олта питл.

Кимет няврем тайты порайна, хой мули сертификат тайл, 222 щәрс солкувайна элты нятла. Хой алаң няврем таймад порайна маткапитал ант ки вуйдыс, щитна кимет нявремал ораңна вуты охал – 912 щәрс солкува олта питл.

Маткапитал анта топ ведац няврем тайты ныңат ораңна мада, хой мули щимац сертификат тайл лув па энамлат.

Мевал посатна па дипломатна майлаптасайт

Приуральской мув нәңхәт Год героев пунсам хатлна мевал посатна па дипломатна майлаптасайт.

Ляльна антамми ювам Сергей Хатанзеев «Орден мужества» нәмпи мевал посна юкантса па лув хаттәл нәңхулад элты маса.

Ши томпына «Боевое братство» нәмпи Ассоциация эвалт ищи майлапсәт осат. «Ветеран

боевых действий» мевал посатна Алексей Мещеряков, Александр Талигин, Андрей Цыганчук, Илья Троицкий юкантсайт, па «За верность» мевал посна – Гаврил Лаптандер.

Нявремат ши хатл па сансна ант хыщлат, Кирилл Орлов – «Память сильнее времени» сочинение хансас, па Диана Атаман – ляль пушци хор хансмал ораңна дипломат сытсаңан.



Хор: ИА «Приуралье»

Талдые-талдые, сикем умась наң!

Там лопасан ай няврэмат ураңан тал пора элты потар шупиет, амаматсет понтсув, ясңат каншты па дэрапты верытлат, хоты войт талдан улдат, луңатты.

Тал пора

Талдэв си ёхтас. Каман сикем хорамаңа йис. Мувев хошам лаңкасыты сохан лаңксалды, юхлув – хошам, нови хоптанан думаттасды. Тал лухсал Ищкең Аки хот ишнет хорам ханшийн оляптасды.

Няврэмат ураңан – сит мет умась пора. Туп ким питапдат, мохты аплак кутан руңкатдыдат, донси паята нох хуңхлат, донсь поталэт ёвалдат, еңк элты дэсытам рэп хуват хатэмидат.

Аңкидал-асидал пидан кешең патинкайн, ухалан па дохан хатэмиды питлат. Мелка йиты юпийн эвет па похат донсь поталэт верты питлат.

Тал пора сьс – сит мет хорамаң пора. Сикем ар амат па ой тал пора тул.



Хор: culture.ru

Буквайт элты ясңат актаты

Там касапсайн амаматсетан буквайт элты ёхды маты ясңат акатты верытлаты.

1. Нови сахан куртат, юхат, хотат дойдат. Так вот ки ёхатал, Нови сахев подамтал.

2. Луңан олдат, талдан хухатдыдат. Рэпа – юх шупиет, рэп элты – довиет.

3. Ёш, кур ант тайл, туп хор ханшты хошал.

4. Тохалды пурдыты па арыты хошал, Хоятат педа ёвартыты. Итдал шушты ант малды, Кимет отдал – нюхалдалды.

5. Турам элты хусат питлат, Мувев иса лаңкаслэл. Тынаң кеват хорпи потам шупиет Мувев хошмалдэл.

6. Яң яй ураңан, кат хоптан тармал.



Хор: culture.ru

Хоты шоврые талдан ул

Тал. Иськи элты войт улты хотлада ил ханемасат. Шоврые па хот, тыхдые ант тайл. Йи хатл варс юх илпийн одал, кимет хатадан сойм хося ханемал, хотя донсь илпийн молты вус

карадал. Туп хошам, нови, донсь хорпи тайты сахалан хошмалда. Луведа хошам па па войт элты ханематы рахал.

Шоврые хатладан одал, атадан лавангыты этдыйл. Хар тахайн донсь ки шимал, молты торн шук уятты верытал. Вотасаң хатлатан унтан ар донсяң пай тыйл. Лув ци пайт элты нох хуңхамтал, ай нувиет па юх карат порэмал. Молты порайн, ванан улты курта хухламтыты верытал, торны пай хося торн лавематы. Ситы си шоврые тал хуват ул.



Хор: pinterest.com

Альбина Тырлина толмацсалды

Хоты Авка лохас мощатас

Хор: rutube.ru



Хор: zooclub.ru

Овс мувна ай Авка ос. Йи лохас харгы ант тайс. Сэңк лытас лохас тайта.

Имоса порайна Ворңа ими сыялас. Ворңа ими вул кев элты амасл – путы, сэмдал лап тохармал, ёраң, нэматтыт педа ант вантал. Авка кев хощаңна лайс па, айлта лавал:

– Ворңа, Ворңа ими!

Ворңа ими сытам.

Лув па вахсалды:

– Ворңа, Ворңа ими!

Ворңа ими йи сэмал еса пунсалды.

Авка мет такан увтас:

– Ворңа, эй, Ворңа!

Вантамтас Ворңа ими, щит хоты сыяласды Авка, уңдал пе-лак талсалды па увтас:

– Мала нанен?

– Маса ма лохсам олта питдан, Ворңа!

Ворңа ими щит яснат холмал юпина, няхта питас. Хув щиты няхас, хащ халас няхтал эвалт, щит юпина лавас:

– Ат ол, хоңха ма хо-щем там пад кев элты.

Амасламан еса, па том кев вур педа пордалман.

– Ма пордыта хонт хасдам, – Авка лавас.

– Щитна, хоты ма наң лохсан олта веритдам, – Ворңа лавас, вул тохалдал пелак пунсалды па ел пордас.

Авка па отща хыщас. Алңищ манас. Хув сосас, ван сосас вул тув сыялас, щита емаң хул палщемал, нёдална йиңк эвалт.

Авка тув хощаңна манас:

– Худые, эй, худые!

Емаң хул нёдал йиңк эвалт ким этгасды:

– Хойна щит ма вахлайм?

– Щит ма, Авка. Маса лохасңан олта питламан?

– Ма па лохас тайта лытдам, – емаң хул лавас. Наварма ма хощем, яха певалта питламан.

– Ма певалта хонт хасдам, – Авка палтамаман лавас.

Емаң хул няхта питас:

– Вантсэн? Мала наң лохас. – Кердас посэдна Авка педа па ел манас.

Авка па отща хыщас. Патдас. Вантдалды Авка: тут сэм ныда, тут хар хощаңна нэңху амасл, лытыт кавартал.

Авка ванна манас.

Нэңхуна сыяласа па ин-щисла:

– Халща па холащ наң мантыт осан, Авка?

Авка халдата питас па лавалсалды нэңху элты, хоты лув лохас тайта лытл.

Холатса нэңхуна па лавал:

– Ал халда. Ма наң лохсан олта питдам.

Авка хыщас па вул нави кадаңи энмас щит лампа хорам аңтат пидна.

Щит пора эвалт лавлат, кадаңат нэңхэт пидна яха олат.

Хойна щанькайт дысайт

Овс мувна Ворңа ими, Няхты вай па Мув вай осат. Имоса порайна щанька дыта дытта питсат. Мув вай инщисдалды:

– Хой дант лотта манл?

Ворңа ими лавал:

– Ма ант мандам. Турам касы, тамхатл ма сэңк ар увсам.

– Ма па ант мандам, – Няхты вай лавал. – Ма тамхатл сосыдыта яңхсам, курдам хощ моралсам.

– Щитна, ма мандам, – Мув вай лавас.

Яңхас па дант тус. Щит юпина инщисдалды:

– Хой дант руватл?

– Ма ант питдам, – Ворңа ими лавал. – Ант дытдам путы пундам нави дантна няңхалта.

– Ма па ант питдам, – Няхты вай лавал. – Пасты кунсдам дант хоща инды питлат.

– Щитна, ма дант руватдам, – мув вай лавас.

Ан вус, йиңк понас, дант понас, еса содаласды. Дант рувтас

па сахал элты понтсалды. Щит юпина инщисдалды:

– Хой щанька саңхарта питл?

– Ма ант питдам, – Ворңа ими лавас. – Тут эвалт сэмдам вуртыйи йидат, няхты вай хор-пи олта питдам.

– Ма ант питдам, – Няхты вай лавал. – Нави пуныйдам посаң эвалт путэт олта питлат, Ворңа ими иты йидам.

– Ма щитна отща щанька саңхардам, – мув вай лавас.

Корд алас. Щанька саңхар-тас.

– Щанька па хой дыта питл, – инщисдалды.

– Ма питдам, – Ворңа ими лавал.

– Ма питдам, – Няхты вай лавал.

– Анта, – Мув вай лавас.

– Ма ропыттем порайна, нын топ вантсатан.

Итта вантатан, хоты ма дыта питдам!

Вусды па щанькайт аса лысды.

Хор: red-balls.livejournal.com



Хор: coollib.net

Хантэт велпаслаты пормасат

Йис тэдна хантэт ар пелак олты тахайи овс мув, унт па ор муват пирысат. Велпаслаты вер ванна тайсэл. Карра, хонты паскан па корсэс антам ос, лув каман рот велпаслаты пормас версат, дыс аматсат.

Лув олапсаел тал верат манты щирна тыйс. Щит аса, хантэт тылащ луңаттот хоща лоңас. Ар пелак тылащ нэ-мат датл тал пора эвалт лайдат: «Ай па Ун кер», «Ас нопатты», «Уйт па Унт дор» па па тылдат. Датл мув хорас тайты тахайна, хантэт щита рахты олапсына осат. Овс мув хорпи тахайтна, ар пелак вутн касдыман яңхсат, кадаң сависат, щи кутна дыты кемна худ велсат па айна-айна велпасласат, ар пелак лэпак хоща. Унт хорпи тахайтна, Асна, Иргыш педа, вуд Ас педа хайты тахайтна, хантэт ар пелак худ велман осат па щи йис верат тамхатл маса хыщсат.

Там лопасна ма мет такан вай велпаслаты пормасат эттада дытлам. Лув Ханты-Мужи куртна олты «Живун» нэмпи Мув хорас этнографической парк-музей хоща лэщатман олат. Щита унт хуват сосыдыман, рахал вантта мала щирна лув верман олат, хоты аматта маслат вай питты ораңна. Йис пора нэңхэт велпаслаты пормасат номас щирна верман олат, йи вай ант хонтал.

Сэңк ям, хонты анта топ нэпекна щимащ велпаслаты пормасат пушщи луңатта рахал, сэмна па сыядата. Щитна, Ханты-Мужи куртна питта ки веритлаты, каман рот пормас вантта рахал.

Вера Лонгортова хансам потар



Хор: Вера Лонгортова

Хор: Зоя Курьямова

Газета «ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель
Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована
Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 0088
Подписные индексы:
на год – ПА700, на полугодие – ПР561

№ 5 (1256)
Газета вышла в свет 1 февраля 2025г.
Подписано в печать 30 января 2025г.
по графику: 16.00
фактически: 16.00
Газета выходит по субботам

Цена годовой подписки 88 руб.,
в розницу не распространяется

Издатель
Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д.1, каб. 106
Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

Генеральный
директор
АНО «Ямал-Медиа»
Зулинова
Марья Андреевна

И.о. главного
редактора
Курьямова
Зоя Николаевна